## Kemp Owyne (34B)

- 1 'COME here, come here, you freely feed,
  An lay your head low on my knee;
  The hardest weird I will you read
  That eer war read to a lady.
- 2 'O meikle dollour sall you dree,
  An ay the sat seas oer ye['s] swim;
  An far mair dollour sall ye dree
  On Eastmuir craigs, or ye them clim.
- 3 'I wot ye's be a weary wight,
  An releived sall ye never be
  Till Kempion, the kingis son,
  Come to the craig and thrice kiss thee.'
- O meickle dollour did she dree,
  An ay the sat seas oer she swam;
  An far mair dollour did she dree
  On Eastmuir craigs, or them she clam;
  An ay she cried for Kempion,
  Gin he would come till her han.
- Now word has gane to Kempion
   That sich a beast was in his lan,
   An ay be sure she would gae mad
   Gin she gat nae help frae his han.
- O biggit ha they a bonny boat,
   An they hae set her to the sea,
   An Kempion an Segramour
   The fiery beast he gane to see:
   A mile afore they reachd the shore,

I wot she gard the red fire flee.

- 8 'O Segramour, keep my boat afloat,
  An lat her no the lan so near;
  For the wicked beast she 'll sure gae mad,
  An set fire to the land an mair.'
- 9 'O out o my stye I winna rise —
  An it is na for the fear o thee —
  Till Kempion, the kingis son,
  Come to the craig an thrice kiss me.'
- 10 He's louted him oer the Eastmuir craig,
  An he has gien her kisses ane;
  Awa she gid, an again she came,
  The fieryest beast that ever was seen.
- 11 'O out o my stye I winna rise —
  An it is na for fear o thee —
  Till Kempion, the kingis son,
  Come to the craig an thrice kiss me.'
- 12 He louted him oer the Eastmuir craig,
  An he has gien her kisses twa;
  Awa she gid, an again she came,
  The fieryest beast that ever you saw.
- 13 'O out o my stye I winna rise —
  An it is na for fear o ye —
  Till Kempion, the kingis son,
  Come to the craig an thrice kiss me.'
- 14 He's louted him oer the Eastmuir craig,
  An he has gien her kisses three;
  Awa she gid, an again she came,
  The fairest lady that ever coud be.
- 15 'An by my sooth,' say[s] Kempion,
   'My ain true love for this is she —
  O was it wolf into the wood,
  Or was it fish intill the sea,

- Or was it man, or wile woman, My true love, that misshapit thee?'
- 16 'It was na wolf into the wood,
  Nor was it fish into the sea,
  But it was my stepmother,
  An wae an weary mot she be.
- 17 'O a heavier weird light her upon
  Than ever fell on wile woman;
  Her hair 's grow rough, an her teeth 's grow lang,
  An on her four feet sal she gang.
- 18 'Nane sall tack pitty her upon,
  But in Wormie's Wood she sall ay won,
  An relieved sall she never be,
  Till St Mungo come oer the sea.'